



Inatsisartunut ilaasortaq Akitsinguaq Olsen, Siumut

Apeqqummut nr. 2010-253-mut akissuteqaat

Inatsisartut suleriaasianni § 36 imm. 1 malillugu apeqqutinik sisamanik uannut akissuteqarfissatut innersuussanik nassiussisimavutit.

Soorlu siusinnerusukku eqqaareersimagiga, namminersorlutik suliffiutilinni suliffissanik siuariartornermillu pilersitsinissaq Naalakkersuisut aallulluarpaat. Inuussutissarsiornermi nalinginnaasumik siunnersuisarneq ukiut nikinneranni kommuninut nuunneqarpoq, sumiiffikkaani siunnersuineq pissarsiarilersinniarlugu suliffeqarfiutillilu sapinngisamik qanilliniarlugit. 2010-p aasaata ingerlanerani kommunerujussuarni sisamani inuussutissarsiornermut suliffissaqartitsiniarnermullu sinniisit Naalakkersuisut arlaleriartumik ataatsimeeqatigarsimavaat, kommunini pineqartuni inuussutissarsiornermik ineriartortitsinermi suliat Naalakkersuisut sapinngisamik pitsaanerpaamik periarfissinneqarnissaat qulakkeerniarlugu.

Taamattaq aatsitassarsiornermi uuliasiornermilu inuussutissarsiuutinut siuariartorfiusunut periarfissat soqutiginartut annertuumik Naalakkersuisut aalluppaat. Periarfissat nuutaat tamakku annertunerpaamik iluaqutigilerniarlugit inuussutissarsiornermik ingerlatsisut sulisartullu piginnaanngorsarnissaat pisariaqarpoq. Piginnaanngorsaanissamik suliniutit tamakku suliffissaqartitsiniarnermi inuussutissarsiuutinillu ineriartortitsinermi suliniutigineqarput.

Apeqqut:

1: Nuna tamakkerlugu 2011-mi inuussutissarsiuutinik nutaanik pilersitsinissaq siuarsarniarlugu Naalakkersuisut sunik suliniuteqarpat?

Akissut 1:

Al 11-mi sinaakkutissat aalajangerneqarsimasut iluanni inuussutissarsiuutinik nutaanik pilersitsiortornissaq Naalakkersuisut tapersersorpaat. Inuussutissarsiornermut Suliffeqarnermullu Naalakkersuisoqarfimmi siunnersuinissat pillugit aningaasarsiornikkut tapiissuteqarnissamat sinaakkusersuineqarpoq, naafferaartumik aaqqiissutit aqutugalugit, tunisassianik ineriartortitsinermut atatillugu tapersersuinikkut, minnerunngitsumillu taarsigassarsisarnerni qularnaveeqqusiisarnikkut. Aaqqiissutit tamakku siunertaraat suliffeqarfinni mikisuni akunnattumillu angissusilinni siuariartornerup tapersersornissaa, kiisalu suliffeqarfinnik nutaanik aallartitsinissanut ikiumnissaq.

2. Sammisami tassani nuna tamakkerlugu aningaasat qanoq agguarneqassappat?

6. december 2010
Sagsnr. 2010-039908
Dok. Nr. 519258.

Postboks 1601
3900 Nuuk
Tlf. (+299) 34 50 00
Fax (+299) 32 56 00
E-mail: isiin@gh.gl
www.nanoq.gl

Akissut 2:

Inuussutissarsiornermi siuarsaanerini aningaasat soorlu AI 2011-mi takuneqarsinnaasutut immikkoortillugit agguarneqarput.

Makkununga aningaasat eqqarsaatigineqarput:

Tunisassianik ineriartortitsinermit tapiissutit – kr 1.900.000

Naafferaartumik siunnersuinermit periarfissat – kr 1.200.000

Aningaasaateqarfik Nukiit aqutigalugu inuussutissarsiornermik siuarsaneq – kr. 900.000

Eqqumiitsuliornermik misigisassarsiornermillu inuussutissarsiornermit ineriartortitsinermit – kr 1.600.000

Nutaaliorneq – kr 1.571.000

3: Inuussutissalerinermi inuussutissarsiornermik siuarsaanerini sunik suliniuteqartoqarpa?

Akissut 3:

Nunap immikkoortortaani inuussutissarsiornermik periusissanik suliarinninneq pillugu Naalakkersuisut nunatsinni kommunit sisamaasut qanimut suleqatigileruttulerpai. Taama suliaqarneq kommunit aallutaat suliniutaallu tunngavigineqarput, suliarlu taanna inuussutissalerinerup iluani inuussutissarsiornermik sammisaqarnerup ineriartortinneqarneranut aamma ilaavoq.

4. Imminut pilersornerup siuarsarnissaa pillugu kiisalu tamatumani nutaanik pilersitsinissat siuarsarnissaat qaqugu qanorlu Naalakkersuisut suliniutiginiarpat?

a. Nunap immikkoortui sorliit sammisami Naalakkersuisut aallartiffissat siunertaraat?

b. Sullassaqarfiit sorliit salliutinneqarniarpat?

Akissut 4 – a aamma b:

4. Inuussutissalerinerup iluani imminut pilersornerup annertusinissaa Naalakkersuisut aallulluarpat. Tamanna ilaatigut pissaaq kommunit sammisani ineriartortitsinissamat kissaatigisaat inatsisiliornikkut kiisalu tapersersuinikkut qitiutitsinikkullu. Kommunini kissaatigisat ineriartortitsinermit suliaqarnermi tapersiititut suliaqarnitsinni ilaatigut aalussatta ilagaat Kommune Kujallermi inuussutissalerinerup tungaatigut pilersaarutissat kissaatigisat Inuussutissarsiornermit Suliffeqarnermullu Naalakkersuisoqarfiup aningaasatigut tapersiineratigut. Aningaasatigut tapersiinerit tamakku aqutigalugit kommunit piginnaasaqarfiit paasiniarnissaannik pikkorissarnerit ingerlassinnaavaat kiisalu Kalaallit Nunaata Kujataani inuussutissat pillugit aalussinissaq siunertaralugu nittartakkamik nutaanik ilisaritsinissaq. Inuussutissarsiuutit taassuma ineriartortinnissaa kommunip qitiutinneruneratigut nunap immikkoortuani misigisassarsiornermillu inuussutissarsiuutit ineriartortinnissaanut periarfissat annertusineqassapput. Takornariartitsinermi, saavaateqarnermi kiisalu akunnittarfilerinermi neriniartarfilerinermilu kaaviiartitat amerlisapput. Taamattaq ukiumi matumani kommunit sisamat aallartitsinissamat suleqatigalugit pilersaarutitut Artek-itut ittunut kr. 400.000-it immikkoortinneqarsimapput. Pilersaarutit tassaapput kommunit namminneq kissaatigisaat.

a. Aalajangiunneqareersimavoq Maniitsumi ilinniarfik ATI Narsamut nuunneqassa-

soq Inuili-mullu kattutsillugu. Tamanna pisussaavoq inuussutissalerinermik ineriartortitsinerup nukittunerusumik qitiuffeqalersinniarneqarnera. Kommune Kujalermi inuussutissarsiutinik ineriartortitsinermini inuussutissalerineq aallutaannut ilaavoq – taamallu kissaateqarneq sapinngisamik pitsaanerpaamik periarfissiniarlugu Naalakkersuisut tapersorsorpaat.

- b. Inuussutissalerinerup iluani malittarisassat nutarternissaat maanna Naalakkersuisut suliarileruttorpaat, ilaatigut oqariaaseq inuk "piginnaasaqartoq" ilisaritinneqassalluni, tassa imaappoq; inuk uumasut nakorsaangitsoq, taannali sinnerlugu neqinik misissuisinnaasoq (tuniniaavinni). Inatsisini taama allangortitsineq ingerlaavartumik misissuisarneq ajonaannerulersissavaa akikinnerulersillugulu - tamatumalu ilaatigut kingunerissavaa tunisassiornermi aningaasartuutit ikinnerulerner, tamatumalu kalaallit nerisassaataannut unammillersinnaassutsip nukit-torsarnissaanut iluaqutaassaaq. Taamattaaq kalaalimineerniarfinni kalaalimerngit pillugit malittarisassat sakkukillisinniarnearput, taamaalilluni tunisassiat tajaortikkat panertuliallu inatsisinik unioqqutitsinani tuniniarneqarsinnaallutik. Taamaattorli pujuukkat aanaveersakkallu (mikiarsikkat) siumut tunisassiorturnik akuersissuteqaqqaarnissaq sulii pisariaqassalluni. Inatsisitigut taama suliniuteqarnermi kalaalimineerniarfinni suliarinnittarneq periarfissanngoriartuaassaaq – taamaalillunilu nioqqutissatigut neqeroorutit annertusinissaat periarfissinneqas-saaq, tamatumalu kingunerisaanik tunisat akissarsiallu amerlissallutik.

Inussiarnersumik inuulluaqqusillunga



Ove Karl Berthelsen